



**Sud Bosne i Hercegovine  
Суд Босне и Херцеговине**

---

*Broj: S1 3 Iž 031637 19 Iž  
Sarajevo, 06.02.2019. godine*

*Sud Bosne i Hercegovine u Sarajevu, u apelacionom upravnom vijeću sastavljenom od sudija, Vesne Trifunović, predsjednika vijeća, Dinke Bešlagić-Čovrk i Srete Crnjak, članova vijeća, odlučujući o žalbi Jasne Ibrišimović iz Tuzle, ul. 18 Hrvatske brigade broj 5, izjavljenoj protiv rješenja Centralne izborne komisije Bosne i Hercegovine, broj: 06-1-07-1-72/18 od 19.04.2018. godine, u pravnoj stvari davanja saglasnosti na Odluku o imenovanju člana Gradske izborne komisije Tuzla, u nejavnoj sjednici održanoj dana 06.02.2019. godine, donio je*

**R J E Š E N J E**

**Žalba se odbija.**

**O b r a z l o ž e n j e**

*Odlukom Centralne izborne komisije Bosne i Hercegovine, broj i datum naveden u uvodu, data je saglasnost na rješenje Gradskog vijeća Tuzla, broj: 01-05-8753-2018/2 od 20.12.2018. godine, kojom je na dužnost u članstvu Gradske izborne komisije Tuzla imenovan Amir Razić.*

*Žaliteljica je blagovremeno uložila žalbu na navedenu odluku zbog bitne povrede pravila upravnog postupka i pogrešne primjene materijalnog prava.*

*U žalbi ističe da je samo primila Obavijest o imenovanju Amira Razića za člana Gradske izborne komisije Tuzla, a nije primila rješenje Gradskog vijeća Tuzla od 20.12.2018. godine niti je obaviještena o rang listi kandidata. Kako nije obaviještena da li ispunjava uslove propisane Izbornim zakonom BiH, niti su joj poznati razlozi koji su opredijelili Komisiju za izbor, to joj je uskraćeno pravo na*

*djelotvoran pravni lijek. Osim toga nacionalni sastav komisije Tuzla ne odražava nacionalnu zastupljenost Srba kao konstitutivnog naroda u BiH.*

*Stoga je predloženo da se žalba usvoji pobijano rješenje poništi i predmet vrati prvostepnom organu na ponovno odlučivanje.*

*Dato je izjašnjenje na žalbu u kojem je istaknuto da je Centralna izborna komisija postupala u okviru svoje nadležnosti i u skladu sa odredbama Izbornog zakona BiH i podzakonskog akta na pravilan i potpun način donijela ožalbena rješenja, sa prijedlogom da se žalba odbije kao neosnovana.*

*Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.*

*Pravilna je i zakonita odluka Centralne izborne komisije Bosne i Hercegovine kojim je data saglasnosti na Rješenje Gradskog vijeća Tuzla kojom je za člana i Gradske izborne komisije Tuzla imenovan Amir Razić kao prvorangirani kandidat.*

*Činjenica da žaliteljica nije obavještena o rang listi kandidata, niti da li ispunjava uslove propisane izbornim zakonom ne uskraćuje žaliteljici pravo na djelotvoran pravni lijek, s obzirom da odluka opštinske izborne komisije nema pravnu snagu do davanja saglasnosti od strane Centralne izborne komisije. Tek davanjem saglasnosti na rješenje kojim je Amir Razić imenovan na dužnost člana Gradske izborne komisije Tuzla, odluka CIK-a BiH podliježe preispitivanju pred sudom u skladu sa odredbom člana 6.9 stav (1) i (2) Izbornog zakona Bosne i Hercegovine, a ujedno se preispituje i pravilnost i zakonitost izvršenog izbora.*

*Žalbeni navodi kojim se ukazuje da nacionalni sastav Gradske izborne komisije ne odražava nacionalnu zastupljenost Srba kao konstitutivnog naroda, te da je izborom Amira Razića narušena jednakopravnost i adekvatna zastupljenost srpskog naroda u Gradskoj izbornoj komisiji Tuzla nema osnova.*

*Naime, prema posljednjem popisu stanovništva u Bosni i Hercegovini iz 2013. godine struktura stanovništva u opštini Tuzla od ukupnog broja stanovnika 110.979 zastupljenost Bošnjaka je 72,78%, Hrvata 13,87%, Srba 3,04% i Ostali 8,24% što bi u potpunosti odgovoralo multietničkom sastavu Gradske izborne komisije Tuzla koja od sedam članova sa novoizabranim članom ima: tri člana iz reda Bošnjaka, jedan iz reda Hrvata, 1 iz reda Srba i 2 iz reda Ostalih.*

*I prema ocjeni Apelacionog vijeća, Suda Bosne i Hercegovine, imajući u vidu priloženu dokumentaciju, ispoštovana je odredba člana 2.12. stav 5. Izbornog zakona BiH, te procedura iz člana 7. Uputstva o utvrđivanju kvalifikacija, broja,*

*imenovanju i razrješenju i obuci članova Izborne komisije , tako što je nakon ocjene koji kandidati ispunjavaju uslove oglasa imenovan prvorangirani kandidat, zbog čega je žalba neosnovana.*

*S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.*

***PREDSJEDNIK VIJEĆA  
S U D I J A  
Vesna Trifunović***

